

4 Vokabulario

Museo Kurá Hulanda

Awe Marla i Sheila ta bolbe bai un museo. Un museo mashá spesial. Papi tambe ta bai huntu ku nan, pasobra awe e ta liber.

Ora tur hende a kaba di desayuná, nan ta dreña outo rumbo pa Otrobanda. Ei tin Museo Kurá Hulanda. Despues di un kuartu di ora nan ta yega. Sheila ta wak rònt sorprendí. E ta mira un plenchi grandi. Na dos banda tin diferente kas koló pastèl. 'Tur e kasnan akí huntu ta forma e museo?' e ta puntra. 'Nò,' Marla ta splika, 'e kasnan ta parti di Hotèl Kurá Hulanda. E museo ta banda di e hotèl.'

Na entrada di e museo papi ta kumpra karchi di entrada. Sheila ta ripará ku e museo no ta un edifisio grandi, sino algun kasita rònt di un plenchi.

Ora nan dreña den e promé kasita, nan ta mira vários vitrina. Den nan tin piedra eksponé ku símbolo grabá den nan.

'Asina hende di ántes tabata nota i warda informashon,' mama ta splika. 'E piedranan akí ta hopi bieú.'

Den e di dos kasita nan ta mira kráneo di hende i bestia. Tantu Marla komo Sheila ta haña nan un tiki spantoso. P'esei papi ta bisa: 'Laga nos sigui numa.' Despues e ta puntra: 'Boso a siña na skol ku hopi aña pasá eksploradónan a deskubri Merka, diferente pais na Amérika Latino i vários isla den Karibe?' 'Sí, papi,' Marla ta kontestá. 'Nos tambe a siña esei,' Sheila ta bisa. 'Wèl,' papi ta sigui, 'e ora ei boso sa tambe ku e eksploradónan tabata usa indjan pa traha komo katibu pa nan den e paisnan ei. Nan tabata traha den mina i riba

plantashi. Ma e indjannan no tabata por ku e trabou pisá. Nan tabata bira malu i fayedé. P'esei e eksploradónan a bai Afrika pa buska katibu. E pover afrikanonan no ker a bandoná nan pais. A kue nan prezu. Tabata mara nan na kadena den espasio chikitu na bordo di barku. Asina tabata transportá nan pa diferente pais. Ei nan mester a traha duru.

Den e di tres kasita boso lo mira tur kos di e tempu tristu ei. Asta boso por mira un parti di e bodega di un barku, kaminda tabata stiwa i mara e katibunan.'

Un tiki tímido Marla i Sheila ta dreña e di tres kas. Nan wowo ta yena ku awa ora nan mira e bui- i kadenanan ku tabata usa pa mara katibu. E bodega di e barku di katibu tambe ta hasi hopi impreshon riba nan.

Ora nan bishitá e otro kasitanan kaminda tin eskultura, tambú i maskarada di Afrika, nan ta ketu ainda. Pero den outo na kaminda pa kas Sheila ta bisa: 'Danki pa a laga mi bishitá e museo akí. Mi a siña masha tantu di e tempu di katibu! Danki Dios awor sklabbitu ta prohibí tur kaminda na mundu!'

Tarea 1

Kiko bo ta yena?

- Lesa e frase bou di kada pintura.
- Buska e palabra ku falta, den e rei akí bou.
- Skibi e palabra den bo skref.


- bodega
- eksponé
- kráneo
- mina



Den ... Marla i Sheila ta mira diferente piedra ... ku símbolo grabá den nan.



Den e di dos kasita nan ta mira ... di hende i bestia.



E katibunan mester a traha den ... i riba ...



Ku barku tabata ... e katibunan afrikano pa diferente pais.



Den ... di e barku tabata stiwa i mara e katibunan.



Danki Dios awor... ta prohibí tur kaminda na mundu.

Tarea 2

- Tin biaha e katibunan tabata rebeldiá. Nan no ker a obedesé nan shon mas. Bo sa ken tabata e lider di e rebellion di mas grandí na Kòrsou?
- Purba di splika dikun ta asina importante ku nos tin un museo manera Museo Kurá Hulanda.

- plantashi
- sklabbitu

Tarea 3

- E diferente edifisioanan di Hotèl Kurá Hulanda ta ifèr den koló pastèl. Kua ta e kolónan ku nos ta yama koló pastèl?



- transportá
- vitrina

5 Pensa bon

5d Ra ra ra, kiko mi ta?

- Tin diferente hende ta traha den un museo pa tur kos kana bon.
- Lesa e splikashon i buska e trabou ku ta kuadra ku e splikashon.

bendedó – direktor – guia – hardinero – mènédjer –
resepsionista – restouradó – vigiladó

1. Asina e bishitantenan yega, mi ta risibí nan i yama nan bon biní.
2. Mi ta kana ku e bishitantenan den museo i splika nan kiko nan ta mira.
3. Ami ta esun ku ta manehá e museo; mi mester sòru pa tur kos kana bon.
4. Mi ta na kabes di e museo.
5. Si tin un opheto den museo ku mester drecha, ami ta esun ku ta drech'é.
6. Den museo tin opheto balioso, p'esei mi mester vigilá.
7. Si tin algu den e tienda di museo ku bo ke kumpra, ami ta yuda bo.
8. Mi ta limpia e kurá di museo i drecha e matanan.

5e Kua palabra bo ta yena ?

- Skohe i yena e palabra korekto.

Afrika – bodega – héroe – indjan – konkistá – libertat –
pais – plantashi – rebeldiá – rebelion – sklabbitut – transportá

Sklabbitut

1. Algun siglo pasá eksploradónan for di Europa a ... diferente pais.
2. E europeonan tabata ke ... grandi na e paisnan di e mundu 'nobo'.
3. Promé ta ... mester a traha komo katibu pa nan.
4. Despues e europeonan a bai buska hende na ...
5. Ku barku nan tabata ... afrikano pa diferente pais.
6. Nan tabata stiwa i mara e pover hendenan den ... di e barku.
7. E katibunan mester a traha hopi duru na nan ... nobo.
8. Tin biaha nan tabata ... i nan no tabata obedesé nan shon mas.
9. Na Kòrsou Tula tabata e lider di un ... grandi.
10. Tula ta un ..., pasobra el a sali na defensa di tur katibu.
11. ... ta algu malu; tur hende mester por biba den ...

